



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 575/3 Prof.

Tiranë, më 22/5 2017

REKOMANDIM

Nr. 13 datë 22/5 2017

Në mbështetje të neneve 29, 30 dhe 32 të Ligjit nr. 9887 datë 10/03/2008 "*Për Mbrojtjen e të Dhënave Personale*" i ndryshuar, neneve 77-112 të Ligjit nr.44/2015 "*Kodi i Procedurave Administrative të Republikës së Shqipërisë*", si dhe provave të administruara në ngarkim të kontrolluesit Universitetit "*Luigj Gurakuqi*" Shkodër,

VËREJ SE:

Në zbatim të Urdhrit Nr.91 datë 27.03.2017 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit Universiteti "*Luigj Gurakuqi*" Shkodër me objekt kontrolli:

- Zbatimi i Ligjit Nr.9887 datë 10.03.2008 "*Për mbrojtjen e të dhënave personale*" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit Universiteti "*Luigj Gurakuqi*" Shkodër.

Grupi i kontrollit, gjatë kryerjes së veprimeve procedurale, u asistua nga përfaqësuesit e kontrolluesit, të cilët ishin njohur me Urdhrin Nr. 91 datë 27.03.2017 të Komisionerit.

Kontrolluesi, Universiteti "*Luigj Gurakuqi*" Shkodër, ushtron aktivitetin e tij në arsimin universitar nëpërmjet fakulteteve të ndryshme si: Fakulteti Ekonomik, Juridik, Shkenca Sociale, Shkencat e Edukimit, Shkencat e Natyrës dhe Gjuhët e Huaja. Grupi i hetimit administrativ ushtroi kontroll jo vetëm në rektorat por dhe pranë Fakultetit Ekonomik.

Kontrolluesi, Universiteti "*Luigj Gurakuqi*" Shkodër, përpunon të dhëna personale kryesisht për subjektet e dhënave "*punëmarrës*" dhe "*studentë*". Përpunimi i të dhënave kryhet në mënyrë manuale (nëpërmjet dokumentacionit në formatin letër) si dhe në mënyrë elektronike nëpërmjet sistemeve të teknologjisë së informacionit të tilla si sistemi i video-vëzhgimit (CCTV), portali i studentit, portali zyrtar i institucionit, pajisje kompjuterike etj.

Gjatë hetimit administrativ të ushtruar në vend, është konstatuar se:

1. Kontrolluesi ka "*Njoftuar*" Zyrën e Komisionerit në lidhje me përpunimin e të dhënave personale. Konstatohet se për shkak të ndryshimeve në kohë në lidhje me mbledhjen, përpunimin dhe ruajtjen e të dhënave personale gjatë ushtrimit të aktivitetit, është i nevojshëm përditësimi dhe rivlerësimi i këtij "*Njoftimi*".

Konstatimi përbën shkelje administrative të nenit 21 dhe 22 të ligjit - "1. Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë".

2. Kontrolluesi nuk disponon rregullore për "Përpunimin dhe mbrojtjen e të dhënave personale".

Konstatimi përbën shkelje administrative të nenit 27 të ligjit – "1. Kontrolluesi ose përpunuesi merr masa organizative dhe teknike të përshtatshme për të mbrojtur të dhënat personale nga shkatërrime të paligjshme, aksidentale, humbje aksidentale, për të mbrojtur aksesin ose përhapjen nga persona të paautorizuar, veçanërisht kur përpunimi i të dhënave bëhet në rrjet, si dhe nga çdo formë tjetër e paligjshme përpunimi.

2. Kontrolluesi merr këto masa të veçanta sigurie:

2/1. Kontrolluesi është i detyruar të dokumentojë masat tekniko-organizative të përshtatura dhe të zbatuara për garantimin e mbrojtjes së të dhënave personale, në përputhje me ligjin dhe rregullore të tjera."

3. Kontrolluesi nuk ka nënshkruar "Deklaratë Konfidencialiteti" me punëmarrësit të cilët kanë akses në mbledhjen, përpunimin dhe ruajtjen e të dhënave personale.

Konstatimi përbën shkelje administrative të nenit 28 të ligjit - "Kontrolluesit, përpunuesit dhe personat, që vihen në dijeni me të dhënat e përpunuara, gjatë ushtrimit të funksioneve të tyre, detyrohen të ruajnë konfidencialitetin dhe besueshmërinë edhe pas përfundimit të funksionit. Këto të dhëna nuk përhapen, përveç rasteve të parashikuara me ligj.

Çdo person që vepron nën autoritetin e kontrolluesit, nuk duhet t'i përpunojë të dhënat personale, tek të cilat ka akses, pa autorizimin e kontrolluesit, përveçse kur detyrohet me ligj."

4. Kontrolluesi mbikëqyr ambientet e brendshme dhe të jashtme nëpërmjet sistemit të video-vëzhgimit (CCTV), të vendosura në hyrje të ambienteve ku ushtron aktivitet si dhe në korridore. Kontrolluesi nuk disponon rregullore për funksionimin e këtij sistemi. Koha e ruajtjes së të dhënave imazhe-video është 13 ditë. Në ambientet e kontrolluesit janë vendosur tabela informuese mbi prezencën e sistemit të video-vëzhgimit (CCTV) por ato nuk janë vendosur në përputhje me formatin standard të miratuar në Udhëzimin Nr.3 të Komisionerit.

Konstatimi përbën shkelje administrative të nenit 18 të ligjit - "1. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t'i përpunojë të dhënat, për mënyrën e përpunimit...".

5. Kontrolluesi ka publikuar në portalin zyrtar <http://www.unishk.edu.al> "Politikat e Privatësisë", por konstatohet se informacioni në përmbajtje të kësaj rubrike nuk është i plotë. Informacioni i publikuar në "Politikat e Privatësisë", ka për qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave,

masat e sigurisë, ruajtjes së konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Konstatimi përbën shkelje administrative të nenit 18 të ligjit - *“J. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t'i përpunojë të dhënat, për mënyrën e përpunimit...”*.

Kontrolluesi, Universiteti *“Luigj Gurakuqi”* Shkodër ka depozituar pranë Zyrës së Komisionerit shkresën Nr.1702/1 Prot., datë 10.05.2017, sipas të cilës vihej në dijeni Komisioneri mbi rikuperimet e konstatimeve të grupit të kontrollit, si më poshtë vijon:

1. Për konstatimin e pikës së dytë, institucioni e ka hartuar rregulloren, por nuk mund të miratohet nga Senati Akademik pa u miratuar statuti i ri konform Ligjit Nr.80/2015 të arsimit të lartë.
2. Për konstatimin e pikës së tretë të gjithë punëmarrësit që aksesojnë të dhëna personale pranë rektoratit të Universitetit *“Luigj Gurakuqi”* Shkodër, duke përfshirë gjithashtu dhe fakultetet, kanë nënshkruar deklaratat e konfidencialitetit.
3. Për konstatimin e pikës së katërt, tabelat informuese për prezencën e sistemit të vëzhgimit (CCTV), janë vendosur sipas standardit të miratuar nga Komisioneri.
4. Për sa i përket konstatimit të pestë, është realizuar publikimi i plotë i rubrikës *“Politikat e Privatësisë”* në portalin zyrtar www.unishk.edu.al në lidhje me të dhënat të cilat mblidhen nëpërmjet këtij portali.

Në zbatim të neneve 87-89 të Ligjit Nr.44/2015 *“Kodi i Procedurave Administrative të Republikës së Shqipërisë”*, përpara marrjes së vendimit përfundimtar, kontrolluesi, Universiteti *“Luigj Gurakuqi”* Shkodër është njoftuar zyrtarisht për pjesëmarrje në seancën dëgjimore që do të zhvillohej në datën 11.05.2017, për të ushtruar të drejtën e tij për tu dëgjuar.

Gjatë seancës dëgjimore, përfaqësuesi i kontrolluesit Universiteti *“Luigj Gurakuqi”* Shkodër, paraqiti pretendimin se:

“Institucioni ynë e ka hartuar rregulloren, por nuk mund të miratohet nga Senati Akademik pa u miratuar statuti i ri konform Ligjit Nr.80/2015 të arsimit të lartë. Gjithashtu është në proces hartimi i rregulloreve për sistemin e vëzhgimit (CCTV)”.

Kontrolluesi Universiteti *“Luigj Gurakuqi”* Shkodër, konstatohet gjithashtu të mos ketë kryer ende përditësimin e Formularit të Njoftimit.

Zyra e Komisionerit, ka parasysh faktin që kontrolluesi ka qenë në bashkëpunim serioz me grupin e hetimit administrativ gjatë ushtrimit të kontrollit dhe ka reaguar në mënyrë të menjëhershme për rikuperimin e shkeljeve.

Sa më sipër:

Në zbatim të nenit 18 dhe 32/1 të Ligjit Nr. 9887 datë 10.03.2008 *“Për Mbrojtjen e të Dhënave Personale”* i ndryshuar,

REKOMANDOJ:

1. Në zbatim të neneve 21 dhe 22 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, kontrolluesi Universiteti "Luigj Gurakuqi" Shkodër, të kryejë në vazhdimësi përditësimin e Formularit të Njoftimit.
2. Në zbatim të nenit 27 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, dhe Udhëzimit Nr.3 datë 05.03.2010 të Komisionerit, kontrolluesi Universiteti "Luigj Gurakuqi" Shkodër, të formalizojë rregulloren për "Përpunimin dhe mbrojtjen e të dhënave personale".
3. Në zbatim të nenit 27 të Ligjit Nr.9887 datë 10.03.2008 "Për Mbrojtjen e të Dhënave Personale" i ndryshuar, dhe Udhëzimit Nr.3 datë 05.03.2010 të Komisionerit, kontrolluesi Universiteti "Luigj Gurakuqi" Shkodër, të hartojë rregullore për funksionimin e sistemit të vëzhgimit (CCTV).
4. Kontrolluesi Universiteti "Luigj Gurakuqi" Shkodër, të realizojë plotësimet e detyrimeve të parashikuara në pikat 2 dhe 3 të këtij Rekomandim, brenda afatit 10 ditor nga momenti i marrjes dijeni.
5. Në rast mos përmbushje të këtyre detyrimeve, Komisioneri vepron sipas nenit 30/2 dhe 39 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 22/5/2017

